

03 AUG 2001

Mahathir-Puteri (Aluan)

PUTERI UMNO HARUS SENTIASA JAGA NAMA BAIK, NASIHAT PRESIDEN PARTI

KUALA LUMPUR, 3 Ogos (Bernama) -- Presiden Umno Datuk Seri Dr Mahathir Mohamad menasihati Puteri Umno supaya sentiasa menjaga nama baik serta bergerak sebagai satu entiti parti Umno.

Beliau berharap satu budaya yang lebih mulia dipupuk bagi menjamin Umno terus diminati oleh generasi akan datang yang sudah tentu mempunyai idealisme yang lebih tinggi.

"Inilah harapan parti dan orang Melayu amnya terhadap Puteri Umno. Saya yakin Puteri Umno tidak akan mengecewakan mereka," menurutnya dalam kata-kata aluan buku cenderahati sempena pelancaran rasmi Puteri Umno Malaysia di Pusat Dagangan Dunia Putra malam ini.

Beliau mengucapkan tahniah kepada Puteri Umno kerana penubuhan rasminya sebagai pergerakan sayap baru parti sambil berkata penubuhan itu membuktikan Umno amat terbuka dan peka kepada perubahan atau pembaharuan asalkan ia boleh membawa kebaikan kepada parti dan sesuai dengan keperluan dan peredaran masa.

Beliau berkata Puteri Umno memberi peluang baik kepada generasi muda wanita Melayu untuk melibatkan diri secara aktif dalam politik khususnya bersama Umno.

"Puteri Umno juga dapat menjadi wadah baru kepada wanita muda Melayu untuk bergiat secara langsung dalam usaha-usaha parti memperjuangkan dan membela nasib bangsa ke arah kemajuan dan kemakmuran," katanya.

Di masa yang sama, Dr Mahathir berkata Puteri Umno bolehlah dianggap sebagai penyediaan barisan pelapis yang akhirnya akan mengambilalih peranan Wanita Umno dan Umno itu sendiri.

Katanya, sebelum ini wanita muda Melayu yang berminat menyertai dan berperanan dalam Umno mendapati tidak banyak peluang yang membolehkan mereka bergerak secara berkesan.

Melalui Puteri Umno, peluang ini dapat disediakan dan sumbangan mereka boleh dibuat dengan cara yang lebih positif, katanya.

"Melalui Puteri Umno juga bakat-bakat baru dapat dikenalpasti lebih awal," katanya sambil menambah walaupun tidak semua akan menjadi pemimpin, namun sumbangan anggota biasa juga penting dalam arena politik.

Puteri Umno yang baru berusia kira-kira empat bulan diterajui oleh ketua penajanya Azalina Othman Said.

-- BERNAMA

NZ NZ FAZ